

KERATAN AKHBAR

TARIKH : 16 JUN 2022
AKHBAR : BERITA HARIAN
MUKA SURAT : 15

1.9 juta kediaman tidak didiami



Mohd Uzir (tengah) bersama Pengarah Jabatan Perangkaan Malaysia Negeri Pahang, Khairulnizam Hassan (kiri) dan Pengarah Kanan Bahagian Perangkaan Penduduk dan Demografi, Wan Mohd Shahrulnizam Wan Mohd Bajuri melihat kandungan buku mengenai Jelajah Banci Malaysia di Kuantan, semalam (Foto Farizul Hafiz Awang/BH)

1.9 juta kediaman tidak didiami

Kuantan: Jabatan Perangkaan (DOSM) merekodkan 1.9 juta daripada 9.6 juta kediaman di seluruh negara tidak didiami.

Ketua Perangkawan, Datuk Seri Dr Mohd Uzir Mahidin, berkata berdasarkan penemuan Banci Malaysia 2020, berbanding 2010 hanya 1.2 juta kediaman kosong direkod yang menunjukkan penambahan 700,000 kediaman. "Statistik itu turut merekodkan sebanyak 18 peratus kediaman di Pahang yang dibeli tidak didiami sepenuhnya dan Melaka pula merekodkan lebih 30 peratus kediaman tidak didiami.

"Antara faktor ialah kediaman dibeli itu tidak didiami dan dijadikan rumah persinggahan, homestay dan lain-lain kerana pemilik bekerja di tempat lain," katanya.

Mohd Uzir berkata demikian pada sidang media sempena Program Jelajah Banci Malaysia: Pahang Bersama Media di sini, semalam.

Dalam perkembangan berkaitan, beliau berkata, Bancian Malaysia 2020 turut merekodkan penduduk negara ini berjumlah 32.4 juta orang.

Katanya, daripada jumlah itu, seramai 17 juta adalah golongan lelaki manakala 15.5 juta pula wanita.

"Nisbah jantina pula 113 lelaki bagi setiap 100 wanita," katanya.

Sementara itu, Mohd Uzir berkata, DOSM yang baharu membangunkan platform data terbuka generasi baharu dikenali sebagai 'KAWASANKU' sedang meningkatkan kesedaran mengenai kewujudan platform itu kepada

rakyat negara ini.

Katanya, ini kerana KAWASANKU mengandungi informasi berkaitan profil demografi penduduk berdasarkan penemuan Banci Penduduk dan Perumahan Malaysia 2020.

"Dengan mengakses KAWASANKU melalui <https://kawasanku.dosm.gov.my/>, rakyat boleh mendapatkan maklumat berkaitan memaparkan statistik kependudukan dan indikator demografi serta sosioekonomi," katanya.

Platform KAWASANKU boleh menjadi nadi kepada perancangan lebih khusus dan spesifik mengikut bidang fokus di peringkat Parlimen dan Dewan Undangan Negeri (DUN) sebagai rujukan dan analisis perbandingan.